


責任編輯：曾學文
封面設計：張德



定價：玖拾捌元壹

49

B949.2
562
2

釋惟靜著
釋圓乘校

佛教歷史

下

江蘇廣陵古籍刻印社



A0814186

PDF

佛教畧史卷五

仁壽松峰寺沙門惟靜輯

成都大慈寺沙門圓乘校

○唐

○賢首四祖

華嚴四祖。諱澄觀。字大休。姓夏侯氏。越州會稽人也。身長九尺四寸。雙手過膝。口四十齒。聲如鐘。目光夜發。晝乃不眊。日記萬言。七行俱下。生于玄宗開元三十六年。母誕之辰。光明滿室。洞徹鄰右。年九歲。禮本州寶林寺體眞禪德爲師。歲曜一周。解通三藏。天寶

唐

佛教畧史卷五

一

七年師十一歲奉恩試經得度纔服田衣思冥理觀
乃講般若涅槃蓮花淨名圓覺一十四經起信寶性
瑜伽唯識俱舍中百因明等九論肅宗至德二年師
受具戒於曇一大師門下行南山止作事遂爲眾德
講演律藏又禮常照禪師受菩薩戒原始要終十哲
自勵體不損沙門之表心不違如來之制坐不背法
界之經性不染情愛之境足不履尼寺之塵脇不觸
居士之榻目不視非儀之彩舌不味過午之餽手不
釋圓明之珠宿不離衣鉢之側從牛頭忠徑山欽問
西來宗旨又謁洛陽無名禪師印可融寂自在受用

卽曰明以照幽。法以達迷。然交映千門。融冶萬有。廣大悉備。盡法界之術。唯大華嚴。復參東京大誥。儼尙聽受。立旨利根。頓悟再周。能演說曰。法界宗乘。全在汝矣。次後名價日高。迨代宗大厯三年。詔師入內。與大辨正。不空三藏於大興善寺譯經。命爲潤文。大德帝一日問佛經大旨。師答條然有緒。帝于言下豁悟。遂事以師禮。恩渥彌厚。至六年。進所譯經。凡七十七部。一百二十卷。于大華嚴寺住錫十稔。緇侶懇命敷揚。因思五地聖人身棲佛境也。心證眞如。尙起後得智學世間解。由是博覽六藝圖史。九流異學。華夏訓

詰竺乾梵字四圍五明聖教世典等書靡不該洽至
德宗建中四年欲下筆著疏先求瑞應卽于般若院
啟曼拏羅優游理觀祈聖佑之一夕夢金容挺持山
嶽月滿毫相卓立空際仍于寐內捧咽面門旣覺而
喜知獲光明遍照之徵矣從此落筆恍若有神絕無
停思當興元元年爲始舊疏中唯賢首得旨遂宗承
之前開十門談立釋文以四分分科至貞元三年告
就疏成二十卷其夕又夢自身爲龍頭枕南臺尾蟠
北臺鱗鬣耀空光逾皎日須臾奮迅化成百千小龍
分照四方而去遂悟此是流通大疏之兆也初爲眾

講。威景雲凝停空中。逾時不散。貞元十二年。宣河東節度使禮部尙書李訢。備禮迎師入京。詔同屬賓三藏般若。翻譯烏茶國所進華嚴後分梵夾。師承睿旨。帝親預譯場。一日不至。卽命寂光依律說欲云。皇有國事。因緣如法僧事。與欲清淨。至十四年二月。譯就共四十卷。進上。是年四月。帝生誕。詔師於麟德殿開示新譯華嚴宗旨。羣臣大集。師陞座說曰。我皇御宇。德合乾坤。光宅萬方。重譯來貢。特回明詔。再譯眞詮。觀顧多天。幸承旨幽讚極虛空之可度。體無邊涯大也。竭滄溟而可飲。法門無盡方也。碎塵刹而可數用。

無能測廣也。離覺所覺。朗萬法之幽邃。佛也。芬敷萬
行。榮耀眾德華也。圓茲行德。飾彼十身嚴也。貫攝立
微。以成眞光之彩。經也。總斯經題之七字。乃爲一部
之宏綱。將契本性。非行莫階。故說普賢無邊勝行。行
起解絕。智證圓明。無碍融通。現前受用。帝大悅。讚曰。
妙哉言乎。微而且顯。賜紫衲方袍。禮爲教授。和尚。十
五年四月。帝誕節。敕有司。備儀輦。迎教授。和尚。入內
殿。闡揚大經。師陞座曰。大哉眞界。萬法資始。包空有
而絕相。入言象而無迹。我佛得之妙踐。眞覺廓盡塵
習。融身刹以相含。流聲光而遐燭。我皇得之靈鑒。虛

極保合太和聖文掩於百王。淳風扇於萬國。華嚴經者。卽窮斯旨。趣盡其源流。故恢廓宏遠。包納冲邃。不可得而思議矣。失其旨。徒修因於曠劫。得其門也。等諸佛於一朝諦觀。一塵法界在掌。理深智遠。識昧辭單。塵蹟聖聰。退座而已。帝時默湛海印。朗然大覺。顧謂羣臣曰。朕之師言雅而簡。辭典而富。扇真風于第一義天。能以聖法清涼。朕心任以清涼。賜爲國師之號。由是中外台輔重臣咸以八戒禮而師之。時順宗在東宮。以心要遣使問師。師答書曰。至道本乎一心。心法本乎無住。無住心體靈知不昧。性相寂然。包含

德用迷現量則惑苦紛然。悟眞性則空明廓徹。雖卽心卽佛。惟證者方知。永貞元年。順宗卽位。詔師于興唐寺爲造普光殿。華嚴閣。塑華藏刹圖。法界會。憲宗元和五年。詔師入內談法。帝問華嚴所詮。何謂法界。師曰。法界者。一切眾生之身心本體也。從本以來。靈明廓徹。廣大虛寂。惟一眞境而已。無有形貌而森羅大千。無有邊際而含容萬有。昭昭于心目之間。而相不可覩。晃晃于色塵之內。而理不可分。非徹法之慧目。離念之明智。不能見自心如此之靈通也。故世尊初成正覺。歎曰。奇哉。我今普見一切眾生具有如來。

智慧德相。但以妄想執著而不能證得。於是稱法界性說華嚴經。全以真空揀情。事理融攝。周徧凝寂。是之謂法界大旨。帝聽玄談。已廓然自得。卽敕有司別鑄金印。刊賜僧統清涼國師之號。統冠天下。繼侶主教門事。穆宗敬宗咸仰巨休。悉封大照國師。文宗太和五年。帝受心戒于師。誓不食蛤。開成元年。帝以師百歲壽誕。賜衣財食。味加封大統國師。大經前後講五十遍。凡著述現流傳者。總四百餘卷。弟子爲人師者三十有八。海岸寂光爲首。稟受學徒一千。唯東京僧睿圭山宗蜜獨得其奧。餘皆虛心實腹而去。開成

三年三月六日召上足三教首座寶印大師海岸等
囑曰吾聞偶運無功先聖悼歎復質無行古人恥之
無昭穆動靜無綸緒往復勿穿鑿異端勿順非辨僞
勿迷陷邪心勿固牢關諍大明不能破長夜之昏慈
母不能保身後之子當取信于佛無取信于人真界
玄微非言說所顯要以深心體解朗然現前對境無
心逢緣不動則不孤我矣跌坐而逝師生歷九朝爲
七帝師世壽一百二僧臘八十三言論清雅動止作
則學瞻九流才供二筆盡形一食不蓄餘長文宗以
祖聖崇仰特輟朝三日重臣縞素身經三七端正凜

嶽顏光益潤承旨奉全身塔于終南山初期有梵僧到闕表稱於慈嶺見二使者凌空而過以咒止而問之答曰余乃北印度文殊堂神也東震取華嚴菩薩大牙歸國供養有旨啓塔驗之果失一牙唯三十九存焉璨然如霜面貌如生遂闍維得舍利數千粒明光瑩潤舌如紅蓮火不能變敕謚仍號清涼國師塔曰妙覺詔相國裴休撰碑記敕寫國師眞儀奉安大興唐寺文宗御製像讚八章餘如別傳

○蓮宗三祖

祖諱承遠不詳其所出初學於成都唐公次資川誦

公至荊州進學於玉泉眞公。令居衡山設教。人從之而化者萬計。始居山西南巖下。人遺之食則食。不遺則食土泥羸形垢面。躬負薪樵。凡化人立中道而教之。以權俾得以疾至。示專念佛法門。書塗巷刻溪谷。丕勤誘掖。人皆負布帛。斬木石委之巖石。祖不拒。不營祠宇。旣具。賜額彌陀寺。營造之餘。悉施與餓疾者。先是有沙門法照者。居廬山。由正定中。趨安樂國。見蒙惡衣侍佛者。佛告曰。此衡山承遠也。出定訪求肖焉。乃從之。學後。照道遍天下。代宗時爲國師。見柳子厚集南碑言其師有至德。欲徵之。度其不可。天子南嚮而禮。

焉賜其居曰般舟道場貞元十八年七月十九日示寂于寺年九十一柳宗元製碑立石寺門之右

○禪宗二枝并分派傳燈

南嶽石頭希遷禪師端州高要陳氏子母妊師卽不茹葷師幼而徇齋旣冠然諾自許鄉民多殺牛祀鬼神師數毀祠奪牛歸後造曹溪得度至青原獲法師閱肇論至會萬物爲已者其唯聖人乎拊几曰聖人無已靡所不已法身無相誰云自他圓鑑靈照于其間萬象體立而自現境智非一孰云去來至哉斯語也遂掩卷不覺寢夢與六祖同乘一龜游泳深池

之內覺而念曰靈龜者智也深池者性海也吾與祖師同乘靈智游性海矣遂著叅同契云竺土大仙心東西密相付云上堂云吾之法門先佛傳授不論禪定精進唯達佛之知見卽心卽佛心佛眾生菩提煩惱名異體一汝等當知自己心靈體離斷常性非垢淨湛然圓滿凡聖齊同應用無方離心意識三界六道惟自心現水月鏡像豈有生滅汝能知之無所不備師於唐天寶初至衡山寺寺之東有石狀如臺乃結菴其上時號石頭和尚南嶽鬼神多顯跡聽法師皆與授戒偶一日見負米登山者問之知爲送供

者師愍之明日卽移庵山下貞元六年示寂德宗謚
無際大師

江西道一禪師漢州什邡縣人姓馬氏故俗稱馬祖
或又云馬大師容貌奇異牛行虎視足下有二輪文
幼歲於本邑羅漢寺出家受具于渝州圓律師開元
中聞衡嶽有讓禪師弘曹溪之旨于是出岷峨玉壘
之深嶮詣靈桂貞篁之幽寂習定衡嶽了明大事密
授心印大弘祖道始於建陽佛迹嶺遷於臨川次至
南康龔公山先是此峰岫間魑魅叢居人莫敢近犯
之者災孽立生師至一宴息遂有神紫衣玄冠致禮